



**Utoqqalinersiallit tamarmik toqqissisimasumik akilersinnaasamillu angerlarsimaffeqartinnissaat qanoq ililluta qulakkeersinnaaneripput pillugu apeqqueteqaat aallaavigalugu oqallinnissamik siunnersuut.**

(Inatsisartunut ilaasortaq Bo Martinsen, Demokraatit)

Demokraatit Inatsisartunut ilaasortaataata Bo Martinsen-ip utoqqarnut atugassarititaasunik ukkataqalersitsineranut qujanaq.

Qulequtaq pingaaruteqartoq, mianernartorlu pineqarpoq. Nunamik, inuiaqatigiinnillu ullumikkut iluaqutigeqisatsinnik, nuannareqisatsinnillu tunngavissiisimasut pineqarput. Toqqissillutik, ataqqinartumik, sapinngisamillu minnerpaamik ernumaatissaqarlutik utoqqaasinnanissaat qulakkiissallugu maanna uagut akisussaaffigaarput.

Utoqqaat pitsaasumik najugaqarnissaminnut, aningaasaqarnerisalu nammassinnaasaannik ineqarnermut akiluteqartarnissaminnut periarfissaqarnissaat Demokraatinut tunngaviusumik tunngaviuvoq. Inissiaq toqqissisimaffigisaq, akilersinnaasarlu inuunerissaarnissami tunngaviit pingaarnersaasut ilagaat. Nunamik nuannersumik pilersitsiniarluni inuunermi ulaperulussimagaanni, utoqqalilluni qaammatip tullissaani inissiamut akissaq ernumassutigisassallugu naleqqutinngilaq.

Aningaasartuutitut matussuseeqataasunik soorlu ineqarnermut tapiissutinik aaqqiissuteqareermat miserratingngilarput, kisiannili aamma taamaakkaluartoq utoqqarpasuit aningaasaqarnikkut ilungersormata nassuerutigisariaqarparput. Tamanna pillugu utoqqaat ataqqinartumik utoqqaanissaasa qulakkeernissaanik qanoq iliorsinnaanitta misissornissaanut patsisissaqarluarpoq.

Ilutigisaanik pilersaarusiornermi kommunit suliassaat attatiinnassallugit pingaaruteqarpoq. Najukkami pissutsinut kommunit ilisimasaqarnerpaapput. Utoqqarnut inissianik sumi pisariaqartitsisoqarnerpaanersoq ilisimavaat, inissiallu qanoq ittut piumaneqarnerusut ilisimallugu. Tamanna pillugu najukkami akisussaaffik attatiinnarneqartariaqarpoq, suliassalli kivinnissaanut kommunit pisariaqartunik isumalluuteqartariaqarlutillu sakkussaqaqartariaqarput.

Siunissamut ungasinnerusumut pilersaarusiornerunissaq aamma pisariaqarpoq. Innuttaasut inuuneqqortusiartuinnarput, tamannalu pillugu inissianik atorsinnaasanik pisariaqartitsineq annertusiartuinnassalluni. Tamanna pillugu siumut eqqarsareerluta inissianik amerlanerusunik pisariaqartitsineq kiisalu pitsaanagerusumik ilusilersuineq, tikkuminassuseq, eqqaamioqanerlu misissortariaqarpagut. Utoqqarnut naleqquttunik inissiaqartitsineq majorallannuinaq aamma tigummiviinnarnut tunngassuteqanngilaq, kisiannili aamma toqqissisimanermit, ataatsimoornermut, eqeersimaartumillu inuunneqarnissamut periarfissaqarnissamik tunngassuteqarluni.



# DEMOKRAATIT

Aamma piviusorsiorpalaassaagut. Kollegiatut isikkullit siunnersuummi siunnerfigineqartut iluaqutitaqarput, akimmiffeqarlutilli aamma. Utoqqarnut tunngasut assigiinngitsorpassuupput, pisariaqartitallu ataasiakkaanut tunngassuteqarnerullutik. Ilaat sullissiviit aamma ilaqquttat qanillugit mikisunik, immikkoortunillu inissianiikkusunnerupput, ilaasalu ataatsimoorinissaq aamma ulluinnarni tapersorsorneqarnissaq kissaatigalugu. Taamaattumik eqaassuseqarnek, najukkamilu aaqqiisinnaanissaq inissaqartinneqassapput.

Pitsaasumik inuuneqarnissamut aningaasaqarnek, allaffissornerlu akimmiffiullutik utoqqaat systemini unittoortitaannginnissaat pingaaruteqarnerpaavoq. Utoqqaat isumakuluuteqaratik, ataasiakkaallu pingaartitativik piffissaqarfigalugit inuusinnaanissaat qulakkeertariaqarparput.

Demokraatit isumaqarput, inuiaqatigiittut utoqqartagut ataqqisariaqarlutigillu iliuuseqarfigisariaqarigut. Tunngaviusumik pisariaqarnerpaat ilungersuutiginaqit utoqqaasinnaasariaqarput. Tamanna pillugu nunami sumi najugaqaraluaaraanni inissiat toqqissisimanartut, akilersinnaasut, naleqquttullu qanoq pitsaanerpaamik qulakkeersinnaanerlutigit oqaloqatigiinneq ingerlatiinnassavarput.

Demokraatinut siullertut inuit pineqarput. Aningaasaqarnek inuunerissaarnissamut akimmiffiunani utoqqaat ataqqinartumik, toqqissimasumillu inuusinnaasariaqarnerat pineqarpoq.

Taakkuupput oqallinnermut Demokraatit maannamut isummersuutigerusutaat.